

摘藻堂四庫全書薈要

集部

欽定四庫全書會要

集部

漢魏六朝百三家集卷七十一

七十一



詳校官候選知縣臣吳甸華

欽定四庫全書薈要卷一萬九千六百五十九集部

漢魏六朝百三家集卷七十

明 張溥 輯


袁淑集

賦

桐賦

越衆木之薰狗勝襟樹之藻縟信爽幹以弱枝實裏素
而表綠若乃根莖條茂跡曠心冲貞觀於曾山之陽抽

景於少澤之東被籍兮煙霞裏珮兮星虹儀丹丘之瑞
羽棲清都之仙宮

秋晴賦

是月也聲晷合朝野分靈收耀虹戢文炎都塞埃旻寓
滌氛曳悲泉之凝霧轉絕垠之巖雲

議

禦虜議

淑元嘉末為御史中丞時索虜南侵至
瓜步太祖使百官議防禦之術淑上議

臣聞函車之獸離山必斃絕波之鱗宕流則枯竭寇遺
醜趨致畿甸蟻萃螽集聞已崩殪天險巖曠地限深遐
故全魏戢其圖盛晉輟其議情屈力殫氣挫勇竭諒不
虞於來臨本無怵於能濟矣乃者變定攜遠阻違授律
由將有弛拙故士少鬪志圍潰之衆匪寇傾淪攻制之
師空自班散濟西勁騎急戰蹙旅淮上訓卒簡備靡旗
是由綏整寡衷戎昭多昧遂使拷潞入患泉伊來擾紛
殄姬風泯毒禹績騰書有渭陰之迫懸鋒均咸陽之警

然而切揣虛實伏匿先彰技索伎能諂詭既顯綿地千里彌行阻深表裏躓礙後先介逼捨陵行之習競湍沙之利今虹見萍生土膏泉動津陸陷溢疢禍洊興芻藁已單米粟莫係水寓衿帶進必傾實河溢扁固退亦隳滅所謂栖烏於烈火之上養魚於叢棘之中或謂損緩江右寬繕淮內竊謂拯扼閩城舊史為允棄遠涼土前言稱非限此要荒猶弗委割况連被京國咫尺神甸數州摧掃列邑殲瘼山淵反覆草木塗地今丘賦千乘井

竿萬集肩摩倍於長安締袂百於臨淄什一而籍實慊
民願履畝以稅既協農和戶競戰心人含銳志皆欲贏
糧請奮釋緯乘城謂宜懸金鑄印要壯果之士重幣甘
辭招摧決之將舉薦板築之下抽登臺皂之間賞之以
焚書報之以相爵俄而招才賀闕異能間至戎貪而無
謀肆而不整迷乎向背之次謬於合散之宜犯軍志之
極害觸兵家之甚諱咸畜憤矣僉策戰矣稱願影從謠
言緡命宜選敢悍數千鶩行潛掩偃旗裹甲鉗馬銜枚

檜稽而起晨壓未陣旌譟亂軍火鼓四臨使景不暇移
塵不及起無不禽鍛獸驚水解霧散埽洗哨類漂鹵浮
山如有決學漏網逡窠逗冗命淮汝戈船遏其還逕究
部勁卒梗其歸塗必翦元雄懸首麾下乃將隻輪不返
戰轆無旋矣於是信臣騰威武士繕力緹組接陰鞞杵
聯響若其偽遁羸張出沒無際楚言漢旆顯默如神固
已日月蔽虧川谷蕩貧負塞殘孽阻山燼黨收險竊命
憑城借土則當因威席卷乘機芟剗泗汴秀士星流電

燭徐阜巖兵雨湊雲集糜亂桑溪之北搖潰瀚海以南
絕其心根勿使能植銜索之枯幾何不蠹是由涸澤而
漁焚林而狩若浚風之儻輕籜杲日之拂浮霜既而尉
洽荷掠之餘望弔網悲之鬼然後天行樞運焱舉烟升
青蓋西巡翠華東幸經啓州野滌一軫策俾高闕再勒
燕然復銘方乃奠山沈河創禮輯策闡燿炎昊之遺則
貫軼商夏之舊文今衆賈拳勇而將術疎怯意者稔泰
日積承平歲久邑無驚赴之急家緩餽戰之勤闕閱訓

之禮簡參屬之飾且亦薦採之法庸未旣歟若乃邦造
里選權論深切躬掾盡幽斬帶尋遠設有沈明能照俊
偉自宣誠感泉雨流通金石氣懾飛賁知窮首起審邪
正順逆之數達昏明損益之宜能揆合民心愚叡物性
登丹墀而敷策躡青蒲而揚謀上說辰鑒下弭素言足
以安民紓國救災恤患則宜拔過寵貴之上褒升戚舊
之右別其旂章滌其班祿出得專譽使不稟命降席折
節同廣武之請設壇致禮均淮陰之授必有要盟之功

竊符之捷夷裔暴狠內外侮棄始附之衆分茂無序盡
以威利勢必攜離首順之徒靡然自及今涑繹故典漚
土纓綏翦焉幽播折首凶狡是猶眇者願明痿之思步
動商遄會功終易感劫晉在於善覘全鄭實寄良謀多
縱反間汨惑心耳發險易之前抵興喪之術衝其猜伏
拂其嫌嗜汨以連率之貴餌以析壤之資罄筆端之用
展辭鋒之銳振辯則堅圍可解馳羽而巖邑易傾必府
鬲土崩枝幹瓦裂故燕樂相侮項范交疑矣或乃言約

功深事通應廣齊圍反駕趙養還君盡輿誦之道畢能
事之效臣幸得出內層禁游心明代澤與身泰恩隨年
行無以逢迎昌運潤飾鴻法今塗有遺鏃蠱未息蜂敢
思涼識少酬閔施但坐幕既乏昭文免胄不能致果竊
觀都護之邊論屬國之兵謨終晁之抗辭杜耿之言事
咸云及經之棘猶闕上竿燭郭之敬裁收下策自恥懦
木智不綜微敢露昧見無會昭採

章

謝中丞章

竊惟此職昭贊實預損益必須兼闕威正刺骨窮文使

權家勲族不敢藉強而侮物戚門右姓不得稱雄以掩

衆昔傳咸闕治臣僚戢懼孫寶移疾卿尹皆怠

書

與始興王濬書

濬嘗送錢三萬餉淑一宿復遣追取
謂使人謬誤欲以戲淑淑與濬書

袁司直之視館敢寓書於上國之宮尹日者猥枉泉賦

降委弊邑弊邑故事是違無或違貳懼非郊贈之禮覲
饗之資不虞君王惠之於是也是有懼焉弗圖旦夕發
咫尺之記藉左右而請以為胥授失旨爰速先弊曾是
附庸臣委末學孤聞者如之何弗疑且亦聞之前志曰
七年之中一與一奪義士猶或非之况密邇旬次何其
裒益之亟也藉恐二三諸侯有以觀大國之政是用敢
布心腹弊室弱生砥節清廉好是潔直以不邪之故而
貧聞天下寧有味夫嗟金者哉不腆供賦束馬先璧以

俟命惟執事所以圖之

與何尚之書

尚之為尚書令領太子詹事致仕於方山著
退居賦以明所守而議者咸謂尚之不能固
志淑為太子左衛率與尚之
書詔書敦勸尚之復攝職

昨遣修問承丈人已晦志山田雖曰年禮宜遵亦事難
斯貴俾疎班邴魏通羨於前策龔貢山衛淪慙乎曩篇
規迨休告雪滌素懷冀尋幽之歡畢闕玄之適但淑逸
操偏迴野性膏滯果滋冲寂必沈樂忘歸然而已議塗

聞者謂丈人微明未耗譽業方籍倘能屈事康道降節
殉務舍南瀕之操淑此行求決矣望眷有積約日無誤

尚之宅在南澗
寺側故云南瀕

傳

真隱傳

鬼谷先生不知何許人也隱居韜智居鬼谷山因以為
稱蘇秦張儀師之遂立功名先生遺書責之曰若二君
豈不見河邊之樹乎僕御折其枝波浪盪其根上無徑

尺之陰身被數尺之痕此木豈與天地有仇怨所居然也子不見嵩岱之松柏華霍之檀桐乎上枝干於青雲下根通於三泉千秋萬歲不受斧斤之患此木豈與天地有骨肉哉蓋所居然也

襍文

弔古文

賈誼發憤於湘江長卿愁悉於園邑彥真因文以悲出伯喈銜史而求入文舉疏誕以殃速德祖精密而禍及

夫然不患思之貧無苦識之淺士以伐能見斥女以驕色貽遣以往古為鏡鑒以未來為鍼艾書余言於子紳亦何勞乎著蔡

鷄九錫文

維神雀元年歲在辛酉八月己酉朔十三日丁酉帝顓頊遣征西大將軍下雉公王鳳西中郎將白門侯扁鵲咨爾浚鷄山子維君天姿英茂乘機晨鳴雖風雨之如晦抗不已之奇聲今以君為使持節金西蠻校尉西河

太守以揚州之會稽封君為會稽公以前浚鷄山子為
湯沐邑君其祇承予命使西海之水如帶浚鷄之山如
礪國以永存爰及苗裔

賀表

浚山侍郎丁鴻舍人鳧亭男梁鴻郎中蘇鵠死罪伏惟
君德著朝野勲加鷄鶩故天王鳳皇特錫位封今鳳鵠
等在柏外願時拜受不勝欣豫之情謹詣栖下以聞

驢山公九錫文

若乃三軍陸邁種運艱難謀臣停筭武夫吟嘆爾乃長
鳴上黨慷慨應邗崎嶇千里荷囊致餐用捷大勳歷世
不刊斯實爾之功者也音隨時興晨夜不默仰契玄象
俯協漏刻應更長鳴毫分不忒雖挈壺著稱未足比德
斯又爾之智也若乃六合昏晦三辰幽冥猶憶天時用
不廢聲斯又爾之明也青春絳身長頭廣額修尾後垂
巨耳雙磔斯又爾之相也嘉麥既熟實須精麩負荷迴
衡迅若轉電惠我衆庶神祇獲薦斯又爾之能也爾有

濟師旅之勲而加之以衆能是用遣中大夫閭丘騾加爾使銜勒大鳴鴻臚班脚大將軍宮亭侯以揚州之廬江江州之廬陵吳國之桐廬合浦之朱廬封爾為驢山公

大蘭王九錫文

大亥十年九月乙亥朔十三日丁亥北燕伯使使者豪豨冊命大蘭王曰咨惟君稟太陰之沈精標羣形於玄質體肥腴而洪茂長無心以遊逸資養於人主雖無

爵而有秩此君之純也君昔封國殷商號曰豕氏葉隆
當時名垂於世此君之美也白駒彰於周詩涉波應乎
隆象歌詠出於人口經千載而流響此君之德也君相
與野遊唯君為雄顧羣數百自西徂東俯歎沫則成霧
仰奮鬣則生風猛毒必噬有敵必攻長驅直突陳無全
鋒此君之勇也

常山王九錫文

及至圖身失所羈束人門馴纓服制惟意所牽登楹而

遨抱梁而眠拾撫遺餘恣口所便

游新亭曲水詩序

離榭修幕陵墜彌阜鑣容旆綵衰野麗雲

詩

效子建白馬篇

詩數云宋齊之末靡極矣而袁陽源白馬
虞子陽壯伐大有建安風骨何從得之

劍騎何翩翩長安五陵間秦地天下樞八方湊才賢荆
魏多壯士宛洛富少年意氣深自負肯事郡邑權藉藉

關外來車徒傾國
鄜五侯競書幣
羣公亟為言
義分明
於霜信行直如弦
交歡池陽下
留宴汾陰西
一朝許人
諾何能坐相捐
影節去函谷
投珮出甘泉
嗟此務遠圖
心為四海懸
但營身意遂
豈校耳目前
俠烈良有聞
古來共知然

負一作許

效古

評此倦遊士
本家自遼東
昔隸李將軍
十載事西戎
結車高闕下
極望見雲中
四面各千里
從橫起巖風
寒燠

豈如節霜雨多異同夕寐北河陰夢還甘泉宮勤役未
云已壯年徒為空迺知古時人所以悲轉蓬

詠冬至

連星貫初厯令月臨首歲薦樂行陰政登金

一作贊陽

滯收涼降天德萌華宣地惠司瑞記

初學記作紀

夜晞書雲

掌朝誓

種蘭

南史云袁淑從母兄劉湛欲淑附已而淑不
為改意由是大相乖失淑乃賦詩尋以病免

種蘭忌當門懷璧莫向楚楚少別玉人門非植蘭所

登宣城郡

悵馬訊舊老茲前乃楚居十代闕州記百祀絕方書闕

啄木詩

集左氏

南山有鳥自名啄木飢則啄樹暮則巢宿無干於人唯
志所欲性清者榮性濁者辱

漢魏六朝百三家集卷七十

欽定四庫全書薈要卷一萬九千六百六十

集部

漢魏六朝百三家集卷七十一

明 張溥 輯

謝惠連集

賦

雪賦

歲將暮時既昏寒風積愁雲繁梁王不悅遊於兔園乃
置旨酒命賓友召鄒生延枚叟相如末至居客之右俄

而微霰零密雪下王乃歌北風於衛詩詠南山於周雅
授簡於司馬大夫曰抽子秘思騁子妍辭侷色揣稱為
寡人賦之相如於是避席而起逡巡而揖曰臣聞雪宮
建於東國雪山峙於西域岐昌發詠於來思姬滿申歌
於黃竹曹風以麻衣比色楚謠以幽蘭儷曲盈尺則呈
瑞於豐年袞丈則表沴於陰德雪之時義遠矣哉請言
其始若乃玄律窮嚴氣升焦溪涸湯谷凝火井滅溫泉
冰沸潭無涌炎風不興北戶墜扉裸壤垂繒於是河海

生雲朔漠飛沙連氛紫靄掩日韜霞霰浙漑而先集雪
紛糅而遂多其為狀也散漫交錯氛氲蕭索藹藹浮浮
漉漉奕奕聯翩飛灑徘徊委積始緣覺而冒棟終開簾
而入隙初便娟於墀廡末縈盈於帷席既因方而為珪
亦遇圓而成璧眇隰則萬頃同縞瞻山則千巖俱白於
是臺如重壁逵似連璐庭列瑤階林挺瓊樹皓鶴奪鮮
白鷗失素紈袖慙冶玉顏掩嫵若乃積素未虧白日朝
鮮爛兮若燭龍銜曜照崑山爾其流滴垂冰緣雷承隅

粲兮若馮夷剖蚌列明珠至夫繽紛繁鶩之貌皓汗皎
潔之儀迴散縈積之勢飛聚凝曜之奇固展轉而無窮
嗟難得而備知若乃申娛玩之無已夜幽靜而多懷風
觸楹而轉響月承幌而通暉酌湘吳之醇酎御狐貉之
羔衣對庭鷗之雙舞瞻雲鴈之孤飛折園中之萱草摘
階上之芳薇踐雪霜之交積憐枝葉之相違馳遙思於
千里願接手而同歸鄒陽聞之憊然心服有懷妍唱敬
接末曲於是乃作而賦積雪之歌歌曰攜佳人兮披重

幄援綺衾兮坐芳褥燎薰鑪兮炳明燭酌桂酒兮揚清
曲又續而為白雪之歌歌曰曲既揚兮酒既陳朱顏醜
兮思自親願低帷以昵枕念褫珮而解紳怨年歲之易
暮傷後會之無因君寧見階上之白雪豈鮮輝於陽春
歌卒王乃尋繹吟翫撫覽扼腕顧謂枚叔起而為亂亂
曰白羽雖白質以輕兮白玉雖白空守貞兮未若茲雪
因時興滅玄陰凝不昧其潔太陽耀不固其節節豈我
名潔豈我貞憑雲升降從風飄零值物賦象任地班形

素因遇立汙隨染成縱心皓然何慮何營

鴻鸕賦

覽水禽之萬類信莫麗乎鴻鸕服昭晰之鮮姿糅玄黃
之美色命儔侶以翔遊憇川湄而偃息超神王以自得
不意虞人之在側網羅幕而雲布摧羽翮於翩翩垂沈
浮之諧豫宛羈畜於籠樊

白鷺賦

有提樊而見獻實振鷺之鮮禽表弗緇之素質挺樂水

之奇心

甘賦

嘉寒園之麗木美獨有此貞芳質歲蕤而懷風性耿介
而凌霜擬夕霞以表色指朝景以齊圓侔萍實乎江介
超玉果於崑山傾子節兮湘之區承君翫兮堂之隅濯
雨兮冒霜長無絕兮芬敷

橘賦

園有嘉樹橘柚煌煌圓丹可翫淑氣芬芳受以玉盤升

君子堂味既滋而事美實厥包之最良

贊

仙人草贊

余之中園有仙人草焉春穎其苗夏秀其英秋有貞實
冬無彫色可謂貫四時而不改者也既嘉其名而美其
質染筆作詠庶以攄述云

園有嘉草名曰仙人
珊珊煒煒莫臻臻穎發炎暑苗
秀和春竒爾靈質乃植中林

雪贊

氣遍霜繁年豐雪積彼厲我和爾素子白其德懿矣玩
之庭隙權陋瑤臺暫踐盈尺

四海贊

九夷六蠻八狄七戎雕鏤異質裳羸殊風致之以德車
軌斯同

琴贊

嶧陽孤桐裁為鳴琴體兼九絃聲備五音重華載揮以

養民心孫登是玩取樂山林

白羽扇贊

惟茲白羽體此濺潔涼齊清風素同冰雪其儀可貴是
用玩悅揮之襟袖以禦炎熱

松贊

松惟靈木擬心雲端跡絕玉除形寄青巒子欲我知求
之歲寒

歲

口箴

宣納之由實伊樞機唯舌是出馳駟安追差釐千里君
子慎微何用口爽信在甘肥

目箴

氣之清明雙眸善識惟道是視瞻彼正直

連珠

連珠四首

蓋聞獻技者易忽養德者難致是以子張重趼不獲哀

公之祿干木偃息不受文侯之位

蓋聞機心難湛不接異類淳德易孚可狎殊方是以高
羅舉而雲鳥降海人萃而水禽翔

蓋聞春蘭早芳實忌鳴鳩秋菊晚秀無憚繁霜何則榮
乎始者易悴貞乎末者難傷是以傅長沙而志沮登金
馬而名揚

蓋聞修已知足慮得其逸競榮昧進志忘其審是以飲
河滿腹而求安愈泰緣木務高而畏下滋甚

文

祭禹廟文

謹遣左曹掾奉水土之羞敬薦夏帝之靈咨聖繼天載
誕英徽克明克哲知章知微運此宏謨卹彼民憂身勞
五岳形疲九州呱呱弗顧虔虔是欽物貴尺璧我重寸
陰乃錫玄圭以告成功虞數既改夏德乃隆臨朝總政
巡國觀風淹留稽嶺乃徂行宮恭司皇役敬屬暉融神
且畧薦乃昭其忠

祭周居士文

維君陶造化之純元侔先哲之遐蹤體無事於高尚蹈
虛素乎中庸不臣天子不事諸侯公辟弗眄王命匪酬
窮歡極樂帶索被裘

祭古冢文

東府掘城北塹八丈餘得古冢上無封域不用塹甃以
木為槨中有二棺正方兩頭無和明器之屬材瓦銅漆
有數十種多異形不可盡識刻木為人長三尺可有二

十餘頭初開見悉是人形以物棖撥之應手灰滅棺上有五銖錢百餘枚水中有甘蔗節及梅李核瓜瓣皆浮出不甚爛壞銘誌不存世代不可得而知也公命城者改埋於東岡祭之以豚酒既不知其名字遠近故假為之號曰冥漠君云爾

元嘉七年九月十四日司徒御屬領直兵令史統作城錄事臨漳令亭侯朱林具豚醪之祭敬薦冥漠君之靈忝總徒旅版築是司窮泉為壑聚壤成基一槨既啓雙

棺在茲捨畚悽愴縱鍾連而芻靈已毀塗車既催几筵
糜腐俎豆傾低盤或梅李盞或醢醢蔗傳餘節瓜表遺
屏追惟夫子生自何代曜質幾年潛靈幾載為壽為夭
寧顯寧晦銘誌堙滅姓字不傳今誰子後曩誰子先功
名美惡如何蔑然百堵皆作十仞斯齊墉不可轉壑不
可迴黃腸既毀便房已頽循題興念撫俑增哀射聲垂
仁廣漢流渥祠骸府阿掩骼城曲仰羨古風為君改卜
輪移北隍窀穸東麓壙即新營棺仍舊木合葬非古周

公所存敬遵昔義還
祔雙魂酒以兩壺牲
以特豚幽靈
髣髴歆我犧樽嗚呼哀哉

樂府

秋胡行二首

以下
四言

春日遲遲桑何萋萋
紅桃含天綠柳舒萋
邂逅祭者遵渚戲
蹊華顏易改良願難諧

係風捕影誠知不得
念彼奔波意慮迴惑
漢女倏忽洛神飄揚
空勤交甫徒勞陳王

隴西行

運有榮枯道有舒屈
潛保黃裳顯服朱黻
誰能守靜棄華辭
榮窮谷是處考槃是
營千金不迴百代傳
名厥包是袖忘憂者
豈何為有用自乖中
原實摘柯摧葉殞條
煩

豫章行

以下
五言

軒帆邈遙路薄送瞰
遐江舟車理殊緬密
友將遠從九里樂同
潤二華念分峰集歡
豈今發離歎自古鍾
促生

靡緩期迅景無遲蹤緇髮迫多素憔悴謝華羊婉婉寡
留畧窈窕閉淹龍如何阻行止憤愠結心胸既微達者
度歡戚誰能封願子保淑慎良訊代徽容

塘上行

芳萱秀陵阿菲質不足營幸有忘憂用移根託君庭垂
穎臨清池擢彩仰華甍霑渥雲雨潤歲蕤吐芳馨願君
眷傾葉留景惠餘明

却東西門行

慷慨發相思惆悵戀音徽四節競闌候六龍引頽機人
生隨時變遷化馬可祈百年難必保千慮盈懷之

代悲哉行

樂府作惠連鮑照集亦載此

羈人感淑節緣感欲回轍我行詎幾時華實驟舒結觀
實情有悲瞻華意無悅覽物懷同志如何復乖別翩翩
翔禽羅闕闕鳴鳥列翔鳴常疇偶所嘆獨乖絕

燕歌行七言

四時推遷迅不停三秋蕭瑟葉解輕飛霜被野鴈南征

念君客遊羈思盈何為淹留無歸聲愛而不見傷心情
朝日潛輝華燈明林鵲同栖渚鴻并接融偶羽依蓬瀛
仇依依類相和鳴余獨何為志無成憂緣物感淚沾纓

猛虎行

以下
雜言

貧不攻九嶷玉倦不憇三危峰九嶷有感號三危無安
容美物標貴用志士勵奇蹤如何祇遠役王命宜肅恭
伐鼓功未著振旅何時從

又

猛虎潛深山長嘯自生風人謂客行樂客行苦心傷

鞠歌行

翔馳騎千里姿伯樂不舉誰能知南荆璧萬金貨卞和不
斷與石離年難留時易隕厲志莫賞徒勞疲沮齊音
溺趙吹匠石善運郢不危古綿眇理參差單心慷慨雙
淚垂

前緩聲歌

羲和織阿去嗟我覩物知命使余轉欲悲歌憂戚人心

胸處山勿居峰在行勿為公居峰大阻銳為公遇讒蔽
雅琴自疎越雅韻能揚揚滑滑相混同終始福祿豐

長安有狹邪

紀郢有通達通達並軒車帝帝雕輪馳軒軒翠蓋舒撰
策之五尹振轡從三閭推劔馮前軾鳴佩專後輿

順東西門行

哀朝茵閔頹力遽化常然馬肯息及壯齒遇世直酌酪
華堂集親識舒情盡歡遣悽惻

詩

三月三日曲水集

以下
五言

四時著平分三春稟融爍遲遲和景婉天天園桃灼携
朋適郊野昧爽辭鄧廓蜚雲興翠嶺芳纓起華薄解轡
偃崇丘藉草繞迴壑際渚羅時菽託波汎輕爵

汎南湖至石帆

軌息陸塗初柁鼓川路始漣漪繁波漾參差層峰峙蕭
疎野趣生逶迤白雲起登陟苦跋涉瞬眄樂心耳即翫

翫有竭在興興無已

西陵遇風獻康樂 五章

我行指孟春春仲尚未發
趣途遠有期念離情無歇
成裝候良辰漾舟陶嘉月
瞻途意少悰還顧情多闕

哲兄感化別相送越垞林
飲餞野亭館分袂澄湖陰
悽悽留子言眷眷浮客心
迴塘隱艫棧遠望絕形音

靡靡即長路戚戚抱遙悲
悲遙但自弭路長當語

五臣
作問

誰行行道轉遠去去情彌遲
昨發浦陽汭今宿浙江湄

屯雲蔽曾嶺驚風湧飛流零雨潤墳澤落雪灑林丘浮

氛晦崖巖積素惑原疇曲汜薄停旅

五臣
作依

通川絕行舟

臨津不得濟佇楫阻風波蕭條洲渚際氣色少諧和西

瞻

五臣
作矚

興游歎東睇起悽歌積憤成疾疴無萱將如何

代古

一作擬客
從遠方來

客從遠方來贈我鵠文綾貯以相思篋緘以同心繩裁
為親身服著以俱寢興別來經年歲歡心不可凌瀉酒
置井中誰能辨斗升合如杯中水誰能判淄澠

秋懷

平生無志意，少小嬰憂患。如何乘苦心，矧復值秋晏。皎皎天月明，奕奕河宿爛。蕭瑟含風蟬，寥唳度雲鴈。寒商動清閨，孤燈暖幽幔。耿介繁慮積，展轉長宵半。夷險難預謀，倚伏昧前筭。雖好相如達，不同長卿慢。頗悅鄭生偃，無取白衣官。未知古人心，且從性所玩。賓至可命觴，朋來當染翰。高臺驟登踐，清波時凌亂。頽魄不再圓，傾羲無兩旦。金石終銷毀，丹青暫彫煥。各勉玄髮歡，無貽

白首歎因歌遂成賦聊用布親串

擣衣

衡紀無淹度晷運倏如催白露滋園菊秋風落庭槐肅
肅莎雞羽烈烈寒螿啼夕陰結空幕宵月皓中閨美人
戒裳服端飾相招攜簪玉出北房鳴金步南階欄高砧
響發楹長杵聲哀微芳起兩袖輕汗染雙題紈素既已
成君子行未歸裁用笥中刀縫為萬里衣盈篋自余手
幽絨候君開腰帶准疇昔不知今是非

泛湖歸出樓中望月

日落泛澄瀛，星羅遊輕橈。
憇榭面曲汜，臨川對迴潮。
輟策共駢筵，並坐相招要。
哀鴻鳴沙渚，悲猿響山椒。
亭亭映江月，颺颺出谷飈。
斐斐氣羃岫，泫泫露盈條。
近矚祛幽蘊，遠視蕩諠囂。
晤言不知罷，從夕至清朝。

七月七日夜詠牛女

落日隱欄楹，升月照簾。
玉臺作房 櫳團團，滿葉露析析。
振條

風蹠足，循廣除。瞬目矚曾穹，雲漢有靈匹。
彌年闕相從

遐川阻暱愛脩渚曠清容弄杼不成藻聳轡驚前蹤昔
離秋已兩今聚夕無雙傾河易迴幹款情玉臺作顏難久悰
沃若靈駕旋寂寥雲幄空留情顧華寢遙心逐奔龍沈
吟為爾感情深意彌重

喜雨

朱明振炎氣溽暑扇溫颺羨彼明月輝離畢經中宵思
此西郊雲既雨盈崇朝上天愍憔悴商羊自吟謠

詠冬

藝文新本字謫作
靈運考舊本正之

七宿乘運曜三星與時滅履霜冰彌堅積寒風愈切繁
雲起重陰迴飈流輕雪園林粲斐皓庭除秀皎潔墀瑣
有凝沍達衢無通轍

讀書

賁園奚足慕下帷故宜遵山成猶一簣崇積始微塵虞
軒雖眇莽顏隰亦何人

離合詩二首

放棹遵遙途方與情人別嘯歌亦何言肅爾凌霜節各

字

夫人皆薄離二友獨懷古思篤子衿詩山

當作三

川何足

苦念字

夜集作離合

四坐宴嘉賓一客自遠臻九言何所戒十善故宜遵

夜集歎乖

詩人咏踟躕搔首歌離別誠哉曩日歡展矣今夕切吾
生赴進令質明即行轍在貧故宜言贈子保温惠曷用

書諸紳久要亮有誓

與孔曲阿別詩

淒淒乘蘭秋言餞千里舟塗屆雲陽邑邑宰有昔遊行
人雖念路為爾暫淹留

詠螺蚌


輕羽不高翔自用弦網羅纖鱗惑芳餌故為釣所加螺
蚌非有心沈迹在泥沙文無雕飾用味非鼎俎和

失題

見藝文
言志類

夕坐苦多慮行歌踐閨中房櫳引傾月步檐結春風

漢魏六朝百三家集卷七十一



總校官庶吉士臣侍朝

校對官檢討臣王坦修

謄錄監生臣程華

欽定四庫全書薈要

集部

漢魏六朝百三家集卷七十二

詳校官候選知縣臣吳甸華



欽定四庫全書薈要卷一萬九千六百六十一

集部

漢魏六朝百三家集卷七十二

明 張溥 輯

謝莊集

賦

月賦

陳王初喪應劉端憂多暇綠苔生閣芳塵凝榭悄焉疚
懷弗怡中夜乃清蘭路肅桂苑騰吹寒山弭蓋秋坂臨

澹壑而怨遙登崇岫而傷遠于時斜漢左界北陸南躔
白露暖空素月流天沈吟齊章殷勤陳篇抽毫進牘以
命仲宣仲宣跪而稱曰臣東鄙幽介長自丘樊昧道情
學孤奉明恩臣聞沈潛既義高明既經日以陽德月以
陰靈擅扶光於東沼嗣若英於西冥引元兔於帝臺集
素娥於后庭朧朧警闕朧朧示冲順辰通燭從星澤風
增華台室揚彩軒宮委照而吳業昌淪精而漢道融若
夫氣霽地表雲斂天末洞庭始波木葉微脫菊散芳於

山椒雁流哀於江瀨升清質之悠悠降澄暉之藹藹列
宿掩縵長河韜映柔祇雪凝圓靈水鏡連觀霜縞周除
冰淨君王乃厭晨歡樂宵宴收妙舞弛清縣去燭房即
月殿芳酒登鳴琴薦若乃涼夜自淒風篁成韻親懿莫
從羈孤遞進聆臯禽之夕聞聽朔管之秋引於是絲桐
練響音容選和徘徊房露惆悵陽阿聲林虛籟淪池滅
波情紆軫其何託愬皓月而長歌歌曰美人邁兮音塵
闕隔千里兮共明月臨風歎兮將焉歇川路長兮不可

越歌響未終餘景就畢滿堂變容迴遑如失又稱歌曰
月既沒兮露欲晞歲方莫兮無與歸佳期可以還微霜
霑人衣陳王曰善乃命執事獻壽薦璧敬珮玉音復之
無數

舞馬賦

天子馭三光總萬寓挹雲經之留憲裁河書之遺矩是
以德澤上昭天下漏泉符瑞之慶咸屬榮懷之應必躔
月昃呈祥乾維效氣賦景河房承靈天馬陵原郊而漸

影躍采淵而泳質辭水穴而南僚去輪臺而東暨乘玉
塞而歸寶菴芝庭而獻祕及其養安騏校進駕龍涓輝
大馭於國皂賁上襄於帝閑超益野而踰綠地軼蘭池
而轢紫燕五王晦其術十氏愔其玄東門豈或狀西河
不能傳既秣苞以均性又佩蘅以崇躅卷雄神於綺文
蓄奔容於帷燭蘊籥雲之銳景戢追電之逸足方疊鎔
於丹鎬亦聯規於朱駮觀其雙壁應範三封中圖元骨
滿燕室虛陽理竟潜策紆汗飛赭沫流朱至於肆夏已

升采齊既薦始徘徊而龍俛終沃若而鸞盼迎調露於
飛鍾赴承雲於驚箭寫秦垆之彌塵狀吳門之曳練窮
虞庭之蹈蹠究遺野之環袷若夫蹠實之態未卷凌遠
之氣方攄歷岱野而過碣石跨滄流而軼姑餘朝送日
於西坂夕歸風於北都尋瓊宮於倏瞬望銀臺於須臾
若乃日宣重光德星昭衍國稱梁岱佇蹕史言壇場望
踐鄙上之瑞彰江間之禎闡榮鏡之運既臻會昌之歷
已辨感五繇之程符鑒羣后之薦典聖主將有事於東

嶽禮也於是順斗極垂次躔戒懸日於昭旦命月題於
上年駢駢翼翼泛修風而浮慶煙肅肅雍雍引八神而
詔九仙下齊郊而掩配林集羸里而降祊田蒲軒次獻
瑄璧承靈金檢茲發玉牒斯刊盛節之義洽升中之禮
殫億兆悅精祇歡聆萬歲於曾岫燭神光於紫壇是以
擊轅之蹈撫埃之舞相與而歌曰聳朝蓋兮泛晨霞靈
之來兮雲漢華山有壽兮松有茂祚神極兮貺皇家然
後悟聖朝之績號慶榮之烈比盛乎天地爭明乎日月

茂實冠於胥庭鴻名邁於勛發業底於告成道臻乎報
謁巍巍乎蕩蕩乎民無得而稱焉

赤鸚鵡賦

徒觀其柔儀所踐蘋藻所挺華景夕映容光晦鮮惠性
昭和天機自曉審國音於寰中達方聲於裔表及其雲
移霞峙霰委雪翻陸離翬漸容裔鴻軒躍林飛岫嶼若
輕電溢烟門集場棲圃暄若天桃被玉園至於氣淳體
浮霧下崖沈月圖光於綠水雲寫影於青林遡還風而

聳翮霑清露而調音

悅曲池賦

北山兮黛柏南谿兮頽石頽岸兮若虹黛樹兮如畫暮
雲兮十里朝霞兮千尺步東池兮夜未久卧西窻兮月
向山引一息於魂內擾百緒於眼前

詔

宋明帝即位赦詔

高祖武皇帝德洞四羸化綿九服太祖文皇帝以大明

定基世祖孝武皇帝以下武寧亂日月所照梯山航海
風雨所均削衽襲帶所以業固盛漢聲溢隆周子業凶
噐自天恐悖成性人面獸心見於韶日反道敗德著自
比年其狎侮五常怠棄三正矯誣上天毒流下國寔開
闢所未有書契所未聞再罹過密而無一日之哀齊斬
在躬方深北里之樂虎兇難匣憑河必彰遂誅滅上宰
窮疊逆之酷虐害國輔究孥戮之刑子鸞同生以昔憾
殄殪敬猷兄弟以睚眦殲夷徵逼義陽將加屠膾陵辱

戚藩擯楚妃主奪立左右竊子置儲肆醜于朝宣淫于
國事穢東陵行汙飛走積愆罔極日月滋深比遂圖犯
玄宮志窺題湊將肆梟獍之禍騁商頓之心又欲鴆毒
崇憲虐加諸父事均宮閭聲遍國都鴟梟小豎莫不寵
暱朝廷忠誠必加戮挫收掩之旨虓虎結轍掠奪之使
白刃相望百僚危氣首領無有全地萬姓崩心妻子不
復相保所以鬼哭山鳴星鉤血降神器殆於馭索景祚
危於綴旒朕假寐凝憂泣血待旦慮大宋之基於焉而

泯武文之業將墜于淵賴七廟之靈藉八百之慶巨猾
斯殄鴻沴時褰皇網絕而復紐天緯缺而更張猥以寡
薄屬承乾統上緝三光之重俯顧庶民之艱業業矜矜
若履冰谷思與億兆同此維新可大赦天下改景和元
年為泰始元年賜民爵二級鰥寡孤獨不能自存者穀
人五斛逋租宿債勿復收犯鄉論清議贓污淫盜並悉
洗除長徒之身特賜原遣亡官失爵禁錮舊勞一依舊
典其昏制謬封並皆刊削

表

上摻才表

臣聞功照千里非特燭車之珍德柔隣國豈徒祕璧之
貴故詩稱殄悴誓述榮懷用能道臻無積化至恭已伏
惟陛下膺慶集圖締寓開縣夕爽選政晨旦調風采言
廝輿觀謠仄遠斯實辰階告平頌聲方製臣竊惟隆被
所漸治亂之由何嘗不興資得才替因失士故楚書以
善人為寶虞典以則哲為難進選之軌既弛中代登造

之律未闡當今必欲崇本康務庇民濟俗匪更恣濫奚
取九成升厯中陽英賢起於徐沛受籙白水茂異出於
荆宛寧二都智之所產七隩才之所集實遇與不遇用
與不用耳今大道光亨萬務俟德而九服之曠九流之
艱提鈞懸衡委之選部一人之鑒易限而天下之才難
原以易限之鑒鏡難原之才使國罔遺授野無滯器其
可得乎昔公叔與僕同升管仲取臣於盜趙文非親士
踈嗣祁奚豈諂讐比子如茅以彙作範前經舉爾所知

式昭往牒且自古任薦賞罰弘明成子舉三哲而身致
魏輔應侯任二士而已捐秦相曰季稱冀缺而疇以田
采張敦進陳湯而坐以褫爵此先事之盛准亦後王之
彛鑒如臣愚見宜普命大臣各舉所知以付尚書依分
銓用若任得其才據主延賞有不稱職宜及其坐重者
免黜輕者左遷被舉之身加以禁錮年數多少隨愆議
制若犯大辟則任者刑論又政平訟理莫先親民親民
之要寔歸守宰故黃霸治潁川累稔杜畿居河東歷載

或就加恩秩或入崇輝寵今蒞民之職自非公私必應
代換者宜遵六年之制進獲章明庸愷退得民不勤擾
如此則下無浮謬之愆上靡棄能之累考績之風載泰
猶薪之歌克昌臣生屬亨路身漸鴻猷遂得奉詔左右
陳愚於側敢露芻言懼氛恒典

為八座江夏王請封禪表

惟皇天崇稱大道始行揖讓迄于有晉雖聿修前緒而
跡淪言廢蔑記於竹素者焉可單書紹乾維建徽號流

風聲被絃管自無懷以來可傳而不朽者七十有四君
罔仁厚而道滅鮮義澆而德宣鍾律之先曠世綿絕難
得而聞丘索著明者尚有遺炳故易稱先天弗違後天
奉時蓋陶唐姚姒商姬之主莫不由斯道也是以風化
大洽光熙于後炎漢二帝亦踵曩則因百姓之心聽輿
人之頌龍駕帝服鏤玉梁甫昌言明稱告成上靈况大
宋表祥唐虞受終素德山龍啟符金玉顯瑞異采騰於
軫墟紫煙謁於邦甸錫冕兆九五之徵文豹赴天歷之

會誠二祖之幽慶聖后之冥休道冠軒堯惠深亭毒而
猶執冲約未言封禪之事四海竊以恧焉臣聞惟皇配
極惟帝祀天故能上稽乾式照臨黔首協和穹昊膺茲
多福高祖武皇帝明並日月光振八區拯己溺之晉濟
橫流之世撥亂寧民應天受命鴻徽洽于海表威稜震
乎沙外太祖文皇帝體聖履仁述業興禮正樂頌作象
厯明達通於神祇玄澤被乎上下仁孝命世獻武英挺
遭運屯否三才湮滅廼龍飛五洲鳳翔九江身先八百

之期斷出人鬼之表慶煙應高牙之建風耀符發迹之
辰親翦凶逆躬清昏盞天地革始夫婦更造豈與彼承
業繼緒拓復禹跡車一其軌書罔異文者同年而議哉
今龍麟已至鳳凰已儀比李已實靈茅已茂雕氣降霽
於宮榭珍露呈味於禁林嘉禾積穗於殿甍連理合幹
於園禦皆耀質離宮植根蘭圃至夫霜毫玄文素翮頰
羽泉河山嶽之瑞草木金石之祥方畿憬塗之謁抗驛
絕祖之奏彪炳雜沓粵不可勝言大平之應茲焉富矣

宜其從天人之誠遵先王之則備萬乘整法駕修封泰
山塵玉岱趾延喬松於東序詔韓岐於西廂麾天閭使
啟闕謁紫宮朝太一奏鈞天詠雲門贊揚幽輿超聲前
古豈不盛哉伏願時命宗伯具茲典度

又

江淮鄙上之使結軌于璧門西鷄北采之譯相望於道
路

改定刑獄表

臣聞明慎用刑獄存姬典哀矜折獄實暉呂命罪疑從
輕既前王之格範寧失弗經亦列聖之恒訓用能化致
升平道臻恭己逮漢文傷不辜之罰除相坐之令孝宣
倍深文之吏立鞠訊之法當是時也號令刑存陛下踐
位親臨聽訟億兆相賀以為無冤民矣而比囹圄未虛
頌聲尚缺臣竊謂五聽之慈弗宣於宰物三宥之澤未
洽於民謬頃年軍旅餘弊劫掠猶繁監司計獲多非其
實或規免咎不慮國患楚對之下鮮不誣濫身遭鈇鑕

之誅家嬰孥戮之痛比伍同閑莫不及罪是則一人罰
謬坐者數十昔齊女告天臨淄臺殞孝婦寃戮東海愆
陽此皆符變靈祇初咸景緯臣近兼訊見重囚八人旋
觀其初死有餘罪詳察其理實並無辜恐此不少誠可
怵惕也舊官長竟囚畢郡遣督郵案驗仍就施刑督郵
賤吏非能異於官長有案驗之名而無研究之實愚謂
此制宜革自今入重之囚縣考正畢以事言郡并送囚
身委二千石親臨覈辯必收聲吞釁然後就戮若二千

石不能決乃度廷尉神州統外移之刺史刺史有疑亦歸臺獄必令死者不怨生者無恨庶鷙棺之諺輟歎於終古兩造之察流詠於方今臣學闇申韓才寡治術輕陳庸管懼乖國憲

請弘風則表

詔云貴戚競利興貨塵肆者悉皆禁制此實允慝民聽其中若有犯違則應依制裁糾若廢法申恩便為令有所屈此處分伏願深思無緣明詔既下而聲實乖爽臣

愚謂大臣在祿位者尤不宜與民爭利不審可得在此
詔不拔葵去織實宜深宏

太子元服上至尊表

伏惟皇太子殿下明兩承乾元良作貳抗法迂身英華
自遠樂以修中禮以治外三善克懋德成教尊今日昭
辰顯加元服對靈祇之望儔上庠之歡率天聲世莫不
載躍

太子元服上太后表

離景承宸樞光陪極毓問東華飛英上序樂正歌風司
成頌德清明神鏡溫文在躬練日簡辰顯被元服懋三
王之教燭少陽之重

謝賜貂裘表

臣莊言主衣黃達宣勅賜臣貂裘匪發衽開玄華有曜
靡毫柔毳黠鑑自凝固以綵越綴暈光逾緝驚臣聞嘖
笑不妄韓裳勿假續有昭庸楚績爰建臣歡忭自歌而
同委衾之澤勤勞未報而叨解裘之寵空荷榮施徒賁

微軀承殊恩必識服以淪生銘悅之情罔知所寘臣受假無由躬拜謹遣表

東海王讓司空表

臣側觀前載與窺洪典三事之授惟帝其難臣乘少籍長久分踰涯量出滿入泰每究榮光不悟乾燭方遠義路同遺下參弘化上尸燮理自非德仞具瞻聲堪民詠未妄臻比澤空集茲靈

讓中書令表

伏惟陛下登取震維臨齊璿政澤與風翔恩從雲動臣
聞璧門天邃鳳沼神深絲綸王言出納帝命自非望允
當時譽宣庠塾未有謬垂曲寵空席茲榮在於平壯猶
不可勉况今綿痼百志俱淪

讓吏部尚書表

招才琴鈞之上取士歌牧之中終能克夷景命榮懷萬
宇豈容先私首曲近有經過且不習冠制趙客興鑒未
聞統馭鄭臣有規匪疴身譏

奏

上封禪儀註奏

臣聞崇號建極必觀俗以樹教正位居體必採世以立
言是以重代列聖咸由厥道立勳上烈融章未分鳴光
委緒歇而罔藏若其顯謚騰軌則系綴聲采徵畧聞聽
爰洎姬漢風流尚存遺芬餘榮綿映紀緯雖年絕世祀
代革精華可得騰金綵奏玉潤鏤迹以燠今鑄德以麗
遠而四望埋禋歌之禮日觀弛修封之容豈非神明之

業難崇功基之迹易泯自茲以降訖于季末莫不欲英
弘徽位詳固洪聲豈徒深默修文淵幽馭世而已諒以
滕非虛奏書匪妄埋擊雨怒神淳廕復樹安得紫壇肅
祇竹宮載竚散火投郊流星奔座寶緯初基厭靈命歷
德振弛維功濟淪象玄浸紛流華液幽潤規存永馭思
詳樹遠太祖文皇帝以啟遘泰運景望震凝采樂調風
集禮宣度祖宗相映軌迹重暉聖上韞錄蕃河竚翔衡
漢金波掩照華耀停明運動時來躍飛風舉澄氛海岱

開景中區歇神還靈頽天重耀儲正凝位於蕙明袞嶽

蕃華於元列故以祥映昌基繫發篆素重以班朝待典

飾令詳儀纂綜淪蕙按騰委逸秦王郊宮裡珪玄時景

集天廟脉壤祥農節至昕陽川丘夙禮網威巡馳表綏

中甸史流其詠民挹其風於是涵迹視陰振聲威響晉歷

代之渠沈闕望內安侯之長賢王入侍殊生詭氣奉俗

還鄉羽族卉儀懷音革狀邊帛絕書權光弛燭天岱發

靈宗河開寶崇丘淪鼎振采泗淵雲皇王嶽摘藻闕漢

并角卽音栖翔禁禦袞甲霜味翹舞川肆榮泉流鏡後
昭河源故以波沸外關雲蒸內澤若其雪趾青毳元文
朱綵日月郊甸擇木弄音重以榮露騰軒蕭雲掩閣鎬
穎萼萌移華淵禁山輿竚衡雲鷄竦翼海鰈泳流江茅
吐蔭校書之列仰筆以飾辭濟代之蕃獻邑以待禮豈
非禮勰氣昌物瑞雲照蒲軒龜珍闕泉淳芳太宰江夏
王臣義恭咀道遵英栖奇麗古該潤圖史施詳閱載表
以功懋往初德耀炎昊升文中岱登牒天關耀冠榮名

摘振聲號而道謙稱首禮以虛挹將使玄祗缺觀幽瑞
乖期梁甫無盛德之容介丘靡升聞之響加窮泉之野
獻八代之馬四交木之鄉奠絕金之楛肅靈重表珍符兼
貺伏惟陛下謨詳淵載衍屬休章依徵聖靈潤色聲業
諏辰稽古肅齊警列儒僚展采禮官相儀懸蕤動音洪
鍾竦節陽路整衛正途清禁於是績環珮端玉藻鳴鳳
竚律騰駕流文間綵比象之容昭明紀數之服徽焯天
陣容藻神行翠蓋懷陰羽華烈照乃詔聯事掌祭賓客

贊儀金支宿縣鑪石潤響命五神以相列闕九闕以集
靈驚衛兵而開雲先雨祇以灑路霞凝生闕煙起成宮
臺冠丹光壇浮素靄爾乃臨中壇備盛禮天降祥錫壽
固皇根谷動神音山傳稱響然後辨年問老陳詩觀俗
歸薦告神奉遺清廟光美之盛彰乎萬古淵祥之烈溢
乎無窮豈不盛歟臣等生接昌辰肅懋明世束教管聞
未足言道且章志湮微代往淪絕抱採遺文辨明訓詔
闕

遙訪鄒魯草滕書堙王之禮具竦石繩金之儀

和芝潤瑛鑄璽乾封懼弗軌屬上徽輝當王則謹奉儀
注以聞

封皇弟奏

臣聞桐主睦親書河汾之策賜帶懷賢敬東平之祚諒
以訓經終始義洽垣墉第某皇弟等器彩明敏令識穎
悟並宜憲章前典光啓祚宇作屏王室式雍帝載臣等
參議可封郡王

改封郡長公主奏

臣聞爵厚懿戚國之恒典景祚既新禮與時渥永興等
七公主可封郡長公主

章

為北中郎謝兼司徒章

臣聞燮理陰陽寅亮天地弗惟其官無人則闕司徒掌
敷五教職擾兆民豈悟乾靈固匱光渥方闡不次之任
殊絕藩岳豈可權尸三事假備六符慙震周迴顧步交
悽

為北中郎拜司徒章

不為震施罔匱鴻慶方稠變調之重遂臻非據智小謀
大周家典規少陽微暄有鑒前史辨其動植布其安擾
以倡九牧阜成王教豈臣眇末所能克荷

啓事

與世祖啓事

賊劬自絕於天裂冠毀冕窮弑極逆開闢未聞四海泣
血幽明同憤奉三月二十七日檄聖迹昭然伏讀感慶

天祚王室獻哲重光殿下文明在嶽神武居陝肅將乾
威龔行天罰滌社稷之仇雪華夷之恥使弛墜之構更
獲締造垢辱之眚復得明目伏承所命柳元景司馬文
恭宗愨沈慶之等精甲十萬已次近道殿下親董銳旅
授律繼進荆鄢之師岷漢之衆舳艫萬里旌旆虧天九
土冥符羣后畢會今獨夫醜類曾不盈旅自相暴殄省
闔橫流百僚屏氣道路以目檄至輒布之京邑朝野同
欣里頌塗歌室家相慶莫不望景聳鳧瞻雲佇足先帝

以日月之光照臨區寓風澤所漸無幽不洽況下官世
荷寵靈叨恩踰量謝病私門幸免虎口雖志在投報其
路無由今大軍近次永清無遠欣悲踊躍不知所裁

牋

與大司馬江夏王義恭牋

下官凡人非有達概異識俗外之志實因羸疾常恐奄
忽故少來無意於人間豈當有心於崇達邪頃年乘事
回薄遂果饗非次既足貽誚明時又亦取愧朋友前以

聖道初開未遑引退及此諸夏事寧方陳微請款志未伸仍荷今授被恩之始具披寸心非惟在已知尤實懼塵穢彛序稟生多病天下所悉兩臂痺疾殆與生俱一月發動不減兩三每至一惡痛來逼心氣餘如綆利害數年遂成痼疾吸吸愒愒常如行尸恒居死病而不復道者豈是疾痊直以荷恩深重思答殊施牽課尪瘵以綜所忝眼患五月來便不復得夜坐恒閉帷避風日晝夜昏懵為此不復得朝謁諸王慶弔親舊唯被勅見不

容停耳此段不堪見賓已數十日持此苦生而使銓綜
九流應對無方之訴實由聖慈罔已然當之信自苦劇
若才堪事任而體氣休健承寵異之遇處自效之塗豈
苟欲思間辭事邪家素貧弊宅舍未立兒息不免麤糲
而安之若命寧復是能忘微祿正以復有切於此處故
無復他願耳今之所希唯在小閑下官微命於天下至
輕在已不能不重屢經披請未蒙哀恕良由誠淺辭訥
不足上感家世無年亡高祖四十曾祖三十二亡祖四

十七下官新歲便三十五加以疾患如此當復幾時見
聖世就其中煎懷若此實在可矜前時曾啟願三吳勅
旨云都不須復議外出莫非過恩然亦是下官生運不
應見一間逸今不敢復言此當付之來生耳但得保餘
年無復物務少得養疴此便是志願永畢在衡門下有
所懷動止必間亦無假居職患於不能裨補萬一耳識
淺才常羸疾如此孤負主上擢授之恩私心實自哀愧
入年便當更申前請以死自固但庸近所訴恐未能仰

徹公恩眄弘深粗照誠懇願侍坐言次賜垂拯助則苦
誠至心庶獲哀允若不蒙降祐下官當於何希冀邪仰
憑愍察願不垂恡

書

為朝士與袁顛書

夫夷陂相因興革遞數或多難而固其國或殷憂而啓
聖明此既著於前史亦彰於聞見王室不造昏凶肆虐
神鼎將淪宗稷幾泯幸天未亡宋乾歷有歸主上體自

聖文繼明作睿而辱均牖里屯踰夏臺既天地俱憤義
勇同奮尅殄鯨鯢三靈更造應天順民爰集寶命四海
屬息肩之歡華戎見來蘇之泰吾等獲免刀鋸僅全首
領復身奉惟新命承亨運緩帶談笑擊壤聖世汝雖劬
勞于外跡阻京師然心期所寄江漢何遠自九江告變
皆謂鄧氏狂惑比日國言籍籍頗塵吾子道路之議豈
其或然聞此之日能無駭惋凶人反道敗德日夜滋深
昵近狡慝取謀豺虎非惟毒流外物惡積中朝乃欲毀

陵邑虐崇憲燒宗廟鹵御物然後蕩覆京都必使蘭蕕
俱盡自非聖上廟算靈圖俛眉遜避維持內外擁衛臣
下則赤縣為戎百姓其魚矣此事此理寧可孰念既天
道輔順謳歌有奉高祖之孫文皇之子德洞九幽功貫
三曜匡拯家國提毓黔首若不子民南面將使神器何
歸而羣下構慝妄生窺覲成軫惑燕貫高亂趙讒人罔
極自古有之汝中京冠冕儒雅世襲多見前載縣鑒忠
邪何遠遺郎中之清軌近忘太尉之純概相與或羣從

舅甥或姻婭周款一旦胡越能無悵悵若疑誑所至邪
誠無窮汝當誓衆奮戈翦此朝食若自延過聽迷塗未
遠聖上臨物以仁接下以愛豈直雍齒先封乃當射鉤
見相矣當由力窘跡屈丹誠未亮邪跂予南服寤寐延
首若反棹汭流歸誠鳳闕錫圭開寓非爾而誰吾等並
過荷曲慈俱叨非服紆金拖玉改觀蓬門入奉舜禹之
涯出見羲唐之化雍容揄揚信白駒空谷之時也奈何
毀擲先基自蹈凶戾山門蕭瑟松庭誰掃言念楚路豈

不思父母之邦幸納惡石以蠲美疢裁書表意爾其圖
之

帖

昨還帖

弟昨還方承一日忽患悶當時乃爾大惡殊不易追企
但想諸治昨來已漸勝眠食復云何頃日寒重春節至
居患者無不增動今作何治眼風不異耳指遣承問謝
莊白呈左僕射

議

索虜互市議

臣愚以為獯獫棄義唯利是視關市之請或以覘國順
之示弱無明柔遠拒而觀釁有足表疆且漢文和親豈
止彭陽之寇武帝修約不廢馬邑之謀故有餘則經畧
不足則閉關何為屈冠帶之邦通引弓之俗樹無益之
軌招塵點之風交易爽議既應深杜和約詭論尤宜固
絕臣庸管多蔽豈識國儀思誘降逮敢不披盡

贊

竹贊

瞻彼中唐綠竹猗猗貞而不介弱而不虧杳裊人圃蕭
瑟雲崖推名楚潭美質梁池

哀策文

宋孝武帝哀策文

應門洞望馳道南除葢塗已撤鬱邑將虛哀子嗣皇帝
擗標池繚周遑旌軫攀七緯之崩淪慟三靈之徂盡百

神慕而行雲沉萬國哀而素霜實衣冠緬邈弓劍不追
敢緝謳頌髣髴希夷其辭曰

樞電皇根月理國緒脣裔丹陵蟬聯華渚二后在天大
行纂武克睿克聖重規襲矩昭昭金式明明玉溫望雲
其遠就日其尊雨零露湛冬暖春暄聲芳納麓道昭賓
門上德無稱至功不器怡悵四始優遊六位綴響蘭深
緝言瓊秘悠哉梁踐眇焉汾肆敬業開寓離經作翰鴻
起荆河鸞遊楚漢泗濱霑明江區承與陝左清郊棠陰

虛館地維不紐乾綱弛機義庭薄蝕紫路流飛泣血派
溪顧瞻川沂孝貫樞極義震寰圍誓鉞皇郊詔師牧甸
七景締華五雲卷扇雪怨園邑掃恥瀛縣啟聖宸益集
寶龍見王室多故國步方蹇淮濟裂冠江荆毀冕東楚
亂常西華啓釁動奠揮圖爰戡爰剪決宙斯澄綿區咸
鏡修風曉逸德星夕映溽露飛甘舒雲結慶禎被動植
信洎翔泳缺禮克宣墜章必構方堂饗極圓流肆胄南
聳郊宮北清靈囿瑤軒春藉翠華冬狩經緯窮文克定

盡武鄣上呈祥介丘載佇在盈念冗成功弗處榮鏡中
世舄奕前古睿業初遠鴻化方亭丹雲承日素景騰星
玉几去襲綴衣在庭辭重陽之昭昭降大夜之冥冥氣
緜矣涼史詔龜筮文物空嚴鑿和虛衛動蜃輅之逶迤
顧壁羽之容裔出國門而分天地向幽途而異身世龍
旌鬱而青槐遠驚葭亂而白楊翳觀初霜之變條聽秋
風之下帶橋山絙雲穀林虧日輦道結寒松庭盡密芝
蓋迫軫上驤春轡萬寓肅其北較靈阿閭其深隘南維

有時傾離光不常鏡騰英聲與茂實方流華於舞詠

皇太子妃哀策文

楹凝桂酒庭肅龍輶風吹國輅雲起郊門皇帝傷總綵
之掩綵悼副禕之滅華行光既宴長河又斜顧而言曰
璇璣有毀郁烈無湮翦素裁簡投之史臣其辭曰

霍岫虧天濤流凝漢祥發桐珪慶昭金算毓景帝里飛
芳戚閑秘儀施谷升音集灌月畧幾望娣袂維良釋悼
春宮承篚少陽五葉行藻四訓抽光歲蕤蕙振婉變瓊

相清徽就遠，祲沴方搏。臨華罷翠，當暄收蘭。複殿生響，長廡結寒。節移虛饋，氣變容衣。中庭草暖，階上螢飛。傷縈里第，痛溢朝闈。霜侵燭昧，風密帷淒。驚葭夕轉，龍驂夜嘶。筵既訣兮，奠既徹兮。背青闕兮，去神閨兮。旌掩鬱而還，泛葢透遲而顧。低素紉，斂維華，駟山燧，恒陰松阿。不曙離天，渥兮就銷。沈委白日兮，即冥暮。菊有秀兮，蘅有芬。德方遠兮，聲彌樹。

宣貴妃謚冊文

維年月日皇帝曰咨故淑儀殷氏惟爾含徽挺茂爰光
素里友琴流苻實華紫掖奉軒景以柔明登譽處椒風
以婉孌升名幽閑之範日藹層闈繁祉之慶方崇蕃世
而當春掩藻中波滅源朕用震悼傷于厥心松區已翦
泉冥將墜宜有旌德第行式衍聲芳今遣某官集冊告
謚曰宣魂而有靈尚茲寵渥嗚呼哀哉

誄

孝武宣貴妃誄

惟大明六年夏四月壬子宣貴妃薨律谷罷煖龍鄉輟

曉照車去魏連城辭趙皇帝痛掖殿之既閱悼泉途之

已宮巡步檐而臨蕙路集重陽而望椒風嗚呼哀哉天

寵方隆王姬下姻肅雍揆景陟此爰臻國軫喪淑之傷

家疑賈妣之怨敢撰德於旂旒庶圖芳於鐘萬其辭曰

玄丘烟煜瑤臺降芬高唐滌雨巫山鬱雲誕發蘭儀光

啟玉度望月方娥瞻星比婺毓德素里棲景宸軒處麗

絺綌出懋蘋蘩修詩賁道稱圖昭言翼訓如幄贊軌堯

門綢繆史館容與經闈陳風緝藻臨豕分微游藝磬數
撫律窮機躊躇冬愛怗悵秋暉展如之華實邦之媛敬
懃顯揚肅恭崇憲奉榮維約承慈以遜逮下延和臨朋
違怨祚靈集社慶藹迎祥皇肩璿式帝女金相聯跗齊
穎接萼均芳以藩以牧燭代輝梁眊朔書氛觀臺告稷
八頌扇和六祈輟滲玗璉滅容翬翟毀衽掩綵瑤光收
華紫禁嗚呼哀哉帷軒夕改駟輅晨遷離宮天邃別殿
雲懸靈衣虛襲組帳空煙巾見餘軸匣有遺絃嗚呼哀

哉移氣朔兮變羅紈白露凝兮歲將闌庭樹驚兮中帷
響金缸暖兮玉座寒純孝擗其俱毀共氣摧其同藥仰
昊天之莫報怨凱風之徒攀茫昧與善寂寥餘慶喪過
于哀棘實滅性世覆冲華國虛淵令嗚呼哀哉題湊既
肅龜筮既辰階撤兩奠庭引雙輜維慕維愛曰子曰身
慟皇情於容物崩列辟於上旻崇徽章而出袞旬照殊
策而去城闈嗚呼哀哉經建春而右轉循閭闔而徑度
旌委鬱於飛飛龍逶遲於步步鏘楚挽於槐風遏邊簫

於松霧涉姑射而環迴望樂池而顧慕嗚呼哀哉晨輶
解鳳曉蓋俄金山庭寢日隧路抽陰重扃閉兮燈已黯
中泉寂兮此夜深銷神躬於壤末散靈魄於天尋響乘
氣兮蘭馭風德有遠兮聲無窮嗚呼哀哉

黃門侍郎劉琨之誄

秋風散兮涼葉稀出吳洲兮謝江畿瞻國門兮聳雲路
睇舊里兮驚客衣魂終朝而三奪心一夜而九飛過建
春兮背闕庭歷承明兮去城輦旌徘徊而北係轡逶遲

而不轉挽掩隧而辛嘶驥含愁而鳴俛顧物色之共傷
見車徒之相泣

墓誌銘

豫章長公主墓誌銘

稟中樞之照體星軒之華肅恭在國掖庭欽其風格勤
衡館庶族仰其德

神葉靈條爰自帝堯文信啟魯肇京于楚宵燭載照娥
英是從婉婉締綵優柔肅雍衡蕙有寶金碧不居泉庭

一夜里館長蕪

司空何尚之墓銘

遠源長瀾自晉徂韓潛川韜玉霍岫騰鸞處華民瞻出
光帝難寂寞壽仁茫昧報施調於飪歸經難褰寄晻映
流芳烟煨作義

樂府

宋明堂歌九首

通典曰建元元年使謝莊造郊廟舞樂明堂
諸樂歌詩南齊書樂志曰明堂祠五帝漢郊

祀歌皆四言宋孝武使謝莊造辭莊依五行
數木數用三火數用七土數用五金數用九
水數用六周頌我將祀文王言皆四其
一句五一句七莊歌太祖亦無定句

迎神歌

地紐謐乾樞回華蓋動紫微開旌蔽日車若雲駕六龍
乘網緼暄帝京耀天邑聖祖降五靈集構瑤庀聳珠簾
漢拂幌月棲檐舞綴暢鍾石融駐飛景鬱行風懋染盛潔
牲牲百禮肅羣司虔皇德遠大孝昌貫九幽洞三光神
之安解玉鑾景福至萬寓歡

登歌

雍臺辨朔澤宮練辰

一作服

潔火夕照明水朝陳六瑚賁

室八羽華庭昭事先聖懷濡上靈肆夏戒敬升歌發德
永固鴻基以綏萬國

歌太祖文皇帝

維天為大維聖祖是則辰居萬寓綏旒下國內靈八輔
外光四瀛萬宮仰蓋日館希旌複殿留景重檐結風刮
楹接緯達響承虹設業設虞在王庭肇禋祀克配乎靈

我將我享維孟之春以孝以敬立我蒸民

歌青帝

參映夕駟照晨靈乘震司青春雁將向桐始蕤柔風舞
暄光遲萌動達萬品新潤無際澤無垠

歌赤帝

龍精初見大火中朱光北至圭景同帝在在離寔司衡
水雨方降木槿榮庶物盛長咸殷阜恩覃四冥被九有

歌黃帝

履建

宋書作良

宅中寓司繩御

宋作總

四方裁化遍寒燠布政

周炎涼景麗條可結霜明冰可折凱風扇朱辰白雲流

素節分至乘結

宋作涇

晷啓閉集恒度帝運緝萬有皇靈

澄國步

歌白帝

百川如鏡天地爽且明雲冲氣舉德盛在素精木葉初
下洞庭始揚波夜光徹地翻霜照懸河庶類收成歲功
行欲寧決地奉渥磬宇承秋

宋作帝靈

歌黑帝

歲月旣晏方馳靈乘坎德司規玄雲合晦鳥

一作歸

路白

雲

一作雪

繁亘天涯雷在地時未光飭國典閉關梁四節

遍萬物殿福九域祚八鄉晨晷促夕漏延太陰極微陽
宣鵲將巢冰已解氣濡水風動泉

送神歌

蘊禮容餘樂度靈方留景欲暮開九重肅五達鳳參差
龍已沫雲旣動河旣梁萬里照四空香神之車歸清都

璇庭寂玉殿虛濬化疑孝風熾顧靈心結皇思

宋世祖廟歌二首

世祖孝武皇帝歌

帝錫二祖長世多祐於穆睿考龔聖承矩玄極弛馭乾
紐墜緒闡我皇維締我宗

一作宋

宇刷定四海肇構神京

復禮輯樂散馬墮城澤物九有化浮八瀛慶雲承掖甘
露飛甍肅肅清廟徽徽闕宮舞蹈象德笙磬陳風黍稷
非盛明德惟崇神其歆止降福無窮

宣太后歌

稟祥月輝毓德軒光嗣徽媯
泐思媚周姜母臨萬寓訓
藹紫房朱絃玉籥式載瓊芳

詩

烝齋應詔

以下
五言

霜露凝宸感肅優動天引西郊滅湮揜

一作
烟奔

東溟起昭

晉舞風泛龍常輪霞浮玉軻紫階協笙鏞金途展應棟

方見六詩和永聞九德潤觀生識幸渥睇服慙輶

一作
輶

恪

和元日雪花應詔

從候昭神世息燧應頌道玄化盡天秘凝功畢地寶笙
鏞流七始玉息承三造委霰下璇蕤疊雪翻瓊藻積曙
境寓明聯萼千里杲掩映順雲懸搖喬從風掃發貺燭
徑前騰瑞光圖表澤厚見身末恩踰悟生眇竦誠岱駕
肅側志梁鑿矯

七夕夜詠牛女應制

輟機起春暮停箱動秋衿璇居照漢右芝駕肅河陰容
裔泛星道逶迤濟煙淪陸離迎宵佩倏爍望昏替俱傾
環氣怨共歇泱年心珠殿釭未沫瑤庭露已深夕清豈
淹拂弦輝無久臨

侍宴蒜山

龍旌拂紆景鳳蓋起流雲轉蕙方因委層華正氛氲煙
竟山郊遠霧罷江天分調石飛延露裁金起承雲

侍東耕

肅鑣奉晨發恭帶厠朝聞仙鄉降朱靄神郊起青雲陰
臺承寒彩陽樹迎初熏觀德欣臨藉瞻道樂遊汾

遊豫章西觀洪崖井

幽願平生積野好歲月彌捨簪神區外整褐靈鄉垂林
遠炎天隔山深白日虧游陰騰鵠嶺飛清起鳳池隱暖
松霞被容與澗煙移將遂丘中性結駕終在斯

自潯陽至都集道里名為詩

山經亟旋覽水牒勅敷尋稽榭誠淹留煙臺信遐臨翔

州凝寒氣秋浦結清陰眇眇高湖曠
遙遙南陵深青溪如委黛黃沙似舒金
觀道雷池側訪德茅堂陰魯顯闕
微迹秦良滅芳音訊遠博望崖探賦
梁山岑崇館非陳
宇茂苑豈舊林

北宅祕園

夕天霽晚氣輕霞澄暮陰微風清幽幌
餘日照青林收光漸牕歇窮園自荒深
綠池翻素景秋槐響寒音伊人儻同愛
絃酒共棲尋

喜雨

燕起知風舞礎潤
識雲流列泉承
夜湛零雨望晨浮
合穎行盛茂分穗方盈疇

江都平解嚴

肅旗簡廟律聳鉞
暢乾靈朝晏推物
泰通渥抃身寧擊
轅歌至世撫壤頌惟馨

從駕頓上

申權臨楚路前茅
望吳雲冀馬依風
蹠邊簫當夜聞

八月侍華林曜靈殿八關齋

玉桴乘夕遠金枝終夜舒澄淳玄化闡希微寂理孚

懷園引

以下
雜言

鴻飛從萬里飛飛河岱起辛勤越霜霧聯翩遡江汜去
舊國違舊鄉舊海悠且長迴首瞻東路延翮向秋方登
楚都入楚關楚地蕭瑟楚山寒歲去冰未已春來雁不
還風肅幌兮露濡庭漢水初綠柳葉青朱光藹藹雲英
英離禽啾啾又晨鳴菊有秀兮松有蕤憂來年去容髮

衰流陰逝景不可追
臨堂危坐悵欲悲
試託意兮向芳
蓀心綿綿兮屬荒
樊想綠蘋兮既冒
沼念幽蘭兮已盈
園天桃晨暮發春
鶯旦夕喧青苔蕪
石路宿草塵蓬門

山夜憂

庭光盡山明歸流風
乘軒卷明月緣河飛
澗鳥鳴兮夜
蟬清橘露靡兮蕙煙
輕凌別浦兮值泉躍
經喬木兮遇
猿驚南臯別鶴行
佇漢東隣孤管入青
天沈疴白髮共
急日朝露過隙詎
賅年年既去兮髮不
還金膏玉液豈

留顏迴舫拓繩戶收棹掩荆關

聯句

華林都亭曲水聯句效栢梁體

九宮盛事予旒纁

宋孝武帝

三輔務根識難亮

揚州刺史江夏王臣義恭

策拙扮鄉慙恩望

南徐州刺史竟陵王臣誕

折衝莫效興民謗

領軍將軍

臣元景

侍禁衛儲恩踰量

太子右率臣暢

臣謬叨寵九流曠

吏部尚書

臣喉脣廢職方思議

侍中臣偃

明筆直繩天威諒

御史中丞臣顏師伯

漢魏六朝百三家集卷七十二